



I Avengers, ven a stâi i Vendicatôrs, a son doi investigatôrs inglês: Emma Peel e John Steed. Emma e je interpretade di Diana Rigg e John al à la muse dal complant Patrick McNee. Jê zovine, sexy e sportive; lui, plui in etât, vistût come un gentleman inglês, cun tant di bombete e ombrene.

A mi mi plasìn une vore ancje parcè che, cuant che ju torni a viodi, mi samee di tornâ indaûr tal timp a cuant che o jeri frut. Ta chê volte a jerin dome doi canâi Rai plui Ciaudistrie, ma ce cualitât! Cumò di canâi a 'nd è mil ma la plui part e je di unusvuardi!

Fevelant dai miei Avengers (no relation with Marvel) us disarai che al è stât un timp che no rivavi a seguîju par plui di cinc minûts a la Rai in b/n, jessint programâts la sabide dopomisdì cuant che o levi a provis di bande cul vecjo mestri Silvio, chel che nus insegnave lis regulis dal Pentograma, come che lu clamave lui. Ce balis lis provis di bande! Uffa! Pierdi il gno telefilm preferît par lâ a sierâsi te vecje Cjase dai Combatents a sintî chel odôr di salive, di bamboo e di metal brunît!

Par furtune che su Sante Cjaudistrie, cualchi timp dopo, ju fasaran viodi a colôrs!

Ce ironie! Ce bieï vistîts! Ce bielîs machinis! Ce bieï agns '60!

A son dai episodis che mi fasin pardabon ridi, come chel li che a contin la storie di une clape di infermîrs che e mandave letaris invelenadis cuntun virus ai otorinolaringoiatris di dut il mont. Chescj puarats, a pene viertis lis letaris, a murivin a cause di un fuart rafredôr !

E ce disi di chel mitic episodi cu la machine che e fâs diventâ piçui? Un dai agjents nemîs al veve fat diventâ piçule Emma e al cirive di cjapâle intun prât... doprant une rêt par paveis! Laser, telefonuts celulârs ante litteram, cybernautis (une sorte di robot), machinis di arint e tantis altris maraveis: chest nus regalave “Agente speciale”, cussì al jere il titul de serie par talian.

E ce biele la musiche de sigle, il “Teme di Emma”: e je in sintonie perfete cui soi moviments di gjatut. Jê e je un gjatut che al fâs mosis di karate. **Lait a cirî la sigle! Gustaitsi cualchi episodi!**

**di Checo Tam**